



Osnovne informacije o načinu prijave na Konkurs i toku prijemnog ispita na Ekonomskom fakultetu u Sarajevu

1. Prijava na Konkurs

Konkurs za upis studenata u prvu godinu prvog ciklusa studija na Ekonomskom fakultetu u Sarajevu objavio je Univerzitet u Sarajevu u četvrtak, 18. juna 2015. godine.

Prije podnošenja potrebne dokumentacije za prijavu na Konkurs neophodno je da kandidat ispuni prijavu za Konkurs koju će, zajedno sa ostalim potrebnim dokumentima, predati u Službi za rad sa studentima i planiranje nastave (u daljem tekstu Služba) Ekonomskog fakulteta u Sarajevu (EFSA).

Prijavu za Konkurs kandidati će pronaći na web stranici EFSA <http://upis.efsa.unsa.ba>, koju će ispravno popunjenu u dva primjerka, zajedno sa ostalom potrebnom dokumentacijom, predati u Službi EFSA. Uputstvo za popunjavanje elektronske prijave objavljeno je na web stranici EFSA i nalazi se u prilogu 1 ovog dokumenta. Prilog 1.

Svi zainteresirani kandidati mogu zaključno sa 3. julom 2015. godine, u periodu od 09:00 do 12:00 i od 15:00 do 18:00 sati donijeti dokumentaciju (navedenu u Konkursu) u Službu, adresa:

Trg oslobođenja – Alija Izetbegović 1, 71 000 Sarajevo.

Prilikom predaje dokumenata u Službu, kandidat će dobiti jednu ovjerenu Prijavu na Konkurs, koju je dužan ponijeti na prijemni ispit. Bez ovjerene Prijave na Konkurs kandidati neće moći pristupiti prijemnom ispitu.

U SLUČAJU POTEŠKOĆA PRILIKOM POPUNJAVANJA PRIJAVE ZA KONKURS OBRATITE SE ČLANOVIMA MIT CENTRA EFSA (II sprat, EFSA, Trg oslobođenja – Alija Izetbegović 1, 71 000 Sarajevo).

Broj telefona: 033 251 881.

2. Prijemni ispit

Prijemni ispit na Ekonomskom fakultetu u Sarajevu održat će se u subotu, 4. jula 2015. godine, sa početkom u 10:00 sati prema rasporedu koji će biti objavljen u petak, 3. jula 2015. godine na oglasnoj ploči Fakulteta i web stranici Fakulteta.

Kandidat je dužan na prijemni ispit donijeti **OVJERENU PRIJAVU NA KONKURS KOJEM SE NALAZI ŠIFRA KANDIDATA, i ličnu kartu.**

UKOLIKO KANDIDAT NE DONESE NAVEDENE DOKUMENTE, NEĆE BITI U MOGUĆNOSTI PRISTUPITI PRIJEMNOM ISPITU!

Za kandidate koji žele upisati odsjek Ekonomij i Menadžment na bosanskom jeziku prijemni ispit traje 105 minuta. Kandidat polaže: prijemni ispit iz predmeta *Matematika*, predmeta *Maternji jezik* i ulazni test iz predmeta *Engleski jezik*.

Za kandidate koji žele upisati odsjek Menadžment na engleskom jeziku prijemni ispit traje 75 minuta. Kandidat polaže: prijemni ispit iz predmeta *Matematika* i predmeta *Engleski jezik*. (NAPOMENA: Test iz predmeta *Engleski jezik* je eliminatoran za kandidate koji konkurišu na odsjek Menadžment – engleski jezik.)

Za kandidate koji žele upisati odsjek Visoka poslovna škola prijemni ispit traje 60 minuta. Kandidat polaže: prijemni ispit iz predmeta *Maternji jezik* i ulazni test iz predmeta *Engleski jezik*.

Za kandidate koji su odabrali način izvođenja nastave Učenjem na daljinu (Distance Learning studij) prijemni ispit traje 30 minuta. Kandidati polažu ulazni test iz predmeta *Engleski jezik*.

Prema obavještenju koje će biti postavljeno u petak, 03. jula 2015. godine na web stranici EFSA, kandidati se informišu o rasporedu polaganja po salama u zavisnosti od početnog slova prezimena, te odabranog odsjeka.

U subotu, 4. jula 2015. godine u 10:00 sati, kandidati su obavezni doći u zgradu Ekonomskog fakulteta, Trg oslobođenja 1, 71 000 Sarajevo, i smjestiti se u salu predviñenu rasporedom.

Nakon ulaska u salu, kandidati pristupaju izradi prijemnog ispita. Dežurni nastavnik dijeli svim kandidatima testove za predmete *Maternji jezik*, *Matematika* i *Engleski jezik*, kao i jedinstveni obrazac na koji kandidati upisuju rješenja zadataka (originalni primjerak i kopija).

Prije pristupanja izradi prijemnog ispita, kandidati su obavezni provjeriti podudarnost označenih grupa na obrascu za odgovore i na testovima.

Nakon isteka vremena predviñenog za izradu prijemnog ispita kandidati su dužni dežurnom nastavniku predati testove i originalni obrazac riješenih zadataka, a kopiju obrasca zadržavaju kandidati.

Primjer formulara za odgovore se nalazi u prilogu – Prilog 2. Formular je sačinjen iz tri dijela:

Dio jedan

U prvom dijelu kandidat je dužan upisati JMBG.

Dio dva

Ovaj dio je rezerviran za upis **šifre kandidata** (čitko na crtice koje su ostavljene za to, a zatim popuniti kružiće, gdje prvi kružić odgovara prvom slovu/broju šifre itd.)

Dio tri

Prilikom popunjavanja trećeg dijela, kandidat odgovara na pitanja iz svakog pojedinačnog testa.

Vrijedi pravilo: jedno pitanje = jedan odgovor.

Pitanje sa više popunjenih odgovora neće se priznavati.

Bitno je da kandidati obrate pažnju na pravilno popunjavanje kružića!

Neophodno je tačan odgovor ispravno popuniti, budući da naknadne ispravke nisu dozvoljene. Kandidatima savjetujemo da **ODGOVORE POPUNE TEK KADA SU POTPUNO SIGURNI, JER NAKON POPUNJAVANJA NISU DOPUŠTENE NIKAKVE ISPRAVKE.**

3. Uputstva za pripremu za prijemni ispit

Predmet: Matematika

Matematika je prirodna nauka koja je jedan od stubova tehnološkog i društvenog napretka. Pored tehničkih i kompjuterskih nauka, i mnoge druge nauke, kao što su, na primjer medicina ili biologija u novije vrijeme, koriste obiman matematički aparat. Lista oblasti matematike koje su svoju primjenu našle u ekonomiji je veoma dugačka i svakim danom se, s novim naučnim otkrićima, proširuje.

Upravo zbog toga je veoma važno da studenti Ekonomskog fakulteta imaju dobro predznanje iz matematike. Oblasti matematike zastupljene na kvalifikacionom ispitu su određene prema budućim potrebama studenata na kvantitativnim i ostalim stručnim predmetima.

Mole se kandidati da obrate pažnju na upute za polaganje testa iz predmeta *Matematika*. Ovo je posebno značajno ako imamo u vidu da je sam koncept polaganja prijemnog ispita iz predmeta Matematika na Ekonomskom fakultetu u Sarajevu za akademsku 2015/16. godinu izmijenjen u odnosu na način polaganja ispita u prethodnim godinama.

Na ispitu dolazi deset zadataka iz deset cjelina (od ukupno jedanaest koje se testiraju) i svaki tačno riješen zadatak nosi po 2 boda. Dakle, maksimalan broj bodova je 20.

Međutim, ispod svakog zadatka su ponuđena četiri moguća rješenja, od kojih je samo jedno tačno, a kandidat na posebnom papiru treba zaokružiti to rješenje (moguće je zaokružiti samo jedno rješenje svakog zadatka).

Kandidati će imati poseban list papira na kojem će rješavati postavljene zadatke, ali taj list papira neće biti pregledan. Skenirat će se samo list sa ponuđenim finalnim odgovorima na pitanja (formular za odgovore). To znači da nije moguće bodovati polovična rješenja zadataka, jer zadatak može biti ili ispravno zaokružen ili ne.

S druge strane, ovakav koncept ispita ima mnogo prednosti:

1. Rezultati testova će biti veoma brzo gotovi.
2. Izbjegnuta je svaka mogućnost ljudske greške pri ispravljanju.
3. Student može na osnovu ponuđenih odgovora naći grešku pri rješavanju (ukoliko je kao rješenje dobio odgovor koji nije ponuđen).

Zadaci su pripremljeni na osnovu dugogodišnjeg iskustva u radu sa studentima, pa su ponuđena rješenja zadataka napisana tako da uključuju rezultate koji se mogu dobiti kada kandidat napravi neke od čestih grešaka i previda. Zbog toga treba biti veoma staložen pri rješavanju zadataka i pažljivo pročitati ponuđene odgovore. Nekada se odgovori veoma malo razlikuju, na primjer u tome da li se neki broj u ponuđenom intervalu ili skupu uključuje ili isključuje. U tom slučaju treba pažljivo pogledati oblast definisanosti i znakove nejednakosti koji se javljaju u zadatku.

Vrijeme predviđeno za izradu testa iznosi 40 minuta i težina zadataka je prilagođena tom vremenu. Međutim, imajući u vidu stres kojima su kandidati izloženi prilikom polaganja ispita, kandidatima se savjetuje da prvo rješavaju one zadatke koje sigurno znaju riješiti, a da kasnije rješavaju one koji im se čine težim. Da bi se položio ispit, potrebno je tačno riješiti pet od zadatih deset zadataka.

Napomena: Uz informativni materijal za kandidate, priložen je i primjer testa iz predmeta Matematika – Prilog 3.

Predmet: Maternji jezik (NAPOMENA: za studente koji konkurišu na odsjeke Ekonomija, Menadžment na bosanskom jeziku i Visoka poslovna škola.)

Ove godine prvi put ćete se, kao kandidat za upis na Ekonomski fakultet, susresti s ovakvim načinom polaganja prijemnog ispita iz maternjeg jezika. Možda se pitate čemu uopće provjera znanja iz jezika i što će nam to? Da, u pravu ste! Ovo i nije klasična provjera znanja. Vi ćete samo biti u prilici da pokažete znanje koje imate iz maternjeg jezika, a stekli ste ga dvanaestogodišnjim školovanjem. Većina vas u svojim svjedočbama ima visoke ocjene, pa cijenimo da vam je ovaj test tek šansa da pokažete šta i koliko znate. Naravno, i mi, kao vaši voditelji kroz akademsko obrazovanje, želimo vam skrenuti

pažnju na segment jezika, jer ukoliko ono što naučite i znate, uspijete iskazati i pokazati tako da vaša okolina prepozna potencijale koje imate, sigurno je da su vaše šanse za dobar posao i uspješnu karijeru veće.

Vaš test iz maternjeg jezika (bosanskog, hrvatskog ili srpskog) sastoji se od 20 pitanja. Sedam pitanja je iz gramatike, sedam iz pravopisa i šest iz književnosti. Pripremili smo vam i probni test. Kada prepoznate ono što znate – označite i saberite koliko ste tačnih odgovora imali, a za koliko ste morali konsultovati udžbenike i priručnike da biste našli odgovor.

Sačinili smo test tako da budemo sigurni da ćete svi vi imati 10 tačnih odgovora, što je donja granica za upis na naš fakultet. Ukoliko želite više bodova, ukoliko želite da provjerite svoje znanje, ukoliko želite da obnovite znanje – ovo su knjige u kojima ćete naći odgovore:

Oblast: gramatika

1. *Naš jezik* za prvi razred gimnazije (autorica: Remzija Hadžiefendić-Parić, izdavač: Sarajevo Publishing, 2003. godina)
2. *Naš jezik* za drugi razred gimnazije (autorica: Ratmira Pjanić, izdavač: Sarajevo Publishing, 2003. godina)
3. *Naš jezik* za treći razred gimnazije (autorica: Senija Midžić, izdavač: Sarajevo Publishing, 2003. godina)

Oblast: pravopis

1. *Pravopis bosanskog jezika*, autor: Senahid Halilović, Dom štampe, Zenica, drugo izdanje, 1999. godina.
2. *Hrvatski pravopis*, autori: Stjepan Babić, Božidar Finka, Milan Moguš, Školska knjiga, Zagreb, 2001. godina.
3. *Pravopis srpskog jezika*, autori: Mitar Pešikan, Jovan Jerković, Mato Pižurica, Matica srpska, Novi Sad, 1993. godina.

U slučaju da kandidati ne mogu pronaći upravo ova izdanja navedenih pravopisa, mogu koristiti i bilo koje kasnije izdanje ovih pravopisa koje su objavili isti autori (npr. školsko izdanje *Pravopisa srpskog jezika* iz 2006. godine, čiji su autori Mitar Pešikan, Jovan Jerković i Mato Pižurica).

Oblast: književnost

1. Čitanka za 3. razred gimnazije, autori: Vedad Spahić, Mirsad Kunić, Sarajevo Publishing, 2008.
2. Čitanka za 4. razred gimnazije, autor: Vedad Spahić, Sarajevo Publishing, 2008.

Vremena imate dovoljno, znanja također. Pažljivo pročitajte pitanja, odgovorite popunjavanjem cijele površine kruga u kojem je slovo a, b ili c. Jedan odgovor je tačan i popunite ga kada ste sigurni da je taj, jer bilo kakve ispravke nisu moguće.

Napomena: Uz informativni materijal za kandidate, priložen je i primjer testa iz predmeta Maternji jezik – Prilog 4..

Predmet: Engleski jezik

Ulazni test iz Engleskog jezika je eliminatoran za kandidate koji konkurišu na Menadžment na engleskom jeziku dok za ostale odsjeke (Ekonomija, Menadžment na bosanskom jeziku, Visoka poslovna škola) NIJE eliminatoran i isključivo služi da bi se utvrdio nivo znanja koji kandidati posjeduju iz ovog jezika. Naime, svi studenti Ekonomskog fakulteta obavezni su da na svakoj godini dostignu i verifiraju nivo znanja utvrđen Nastavnim planom i programom (više podataka o potrebnim nivoima može se naći u informativnom paketu). U tu svrhu studenti trebaju pohađati online kurseve odgovarajućeg nivoa. Ulazni test u sklopu prijemnog ispita treba ustanoviti od kojeg kursa svaki kandidat treba početi usavršavanje znanja engleskog jezika, odnosno da li kandidat posjeduje znanje dovoljno za verifikaciju za prvu godinu.

Test se sastoji od 20 pitanja sa po 4 ponuđena odgovora. Pitanja testiraju znanje općeg engleskog na početnom i nižem srednjem nivou, kao i poznavanje osnovne poslovne terminologije i komunikacije. Na osnovu rezultata ulaznog testa kandidati mogu biti raspoređeni na Uvodni kurs, Kurs 1, Kurs 2 ili mogu zadovoljavati uslove za verifikaciju (Verif.).

Napomena: Uz informativni materijal za kandidate, priložen je i primjer testa iz predmeta Engleski jezik – Prilog 5.